



AVOKATI I POPULLIT

Adresa: Bulevardi: "Zhan D'Ark" Nr.2
Tiranë, Shqipëri



REPUBLIKA E SHQIPËRISË
AVOKATI I POPULLIT

Mekanizmi Kombëtar për Parandalimin e Torturës,
trajtimit ose dënimit të egër, çnjerëzor ose poshtëruës

Tel/Fax: +355 4 2380 300/313
E-mail: ap@avokatipopullit.gov.al
www.avokatipopullit.gov.al

Nr. Prot.
Nr. Dok. 202201153/2

Tiranë ___/___/2022

Lënda: Rekomandime për inspektimin e bërë në Komisaratin e Policisë Bulqizë

Drejtuar: Z. Florian RRASA
Shef i Komisarimit të Policisë

BULQIZË

Për dijeni: Drejtues i parë Z. Dhimitraq ZIU
Drejtor i Drejtorisë Vendore të Policisë

DIBËR

Të nderuar,

Avokati i Popullit, në rolin e Mekanizmit Kombëtar për Parandalimin e Torturës, Trajtimit ose dënimit të egër, çnjerëzor ose poshtëruës, në vijim Mekanizmi Kombëtar, seksion pranë Avokatit të Popullit, bazuar në nenin 19/1 të ligjit nr. 8454, datë 04.02.1999 "Për Avokatin e Popullit", i ndryshuar, dhe nenin 81 të ligjit nr.81, datë 25.06.2020 "Për të drejtat dhe trajtimin e të dënuarve me burgim dhe të të paraburgosurve" kreu një inspektim në Komisaratin e Policisë Bulqizë.

Inspektimi u krye në datën 22.09.2022, sipas Planit të Inspektimit të miratuar nga Avokati i Popullit. Në përbërje të grupit inspektues ishin z. Hazbi Selita, znj. Gloria Çarkaxhiu dhe znj. Nertila Qafzezi, nd/komisionerë pranë Mekanizmit Kombëtar.

Inspektimi kishte si qëllim verifikimin e respektimit të standardeve të përcaktuara në ligjin nr.108/2014 "Për Policinë e Shtetit", i ndryshuar, Urdhrin e Drejtorit të Përgjithshëm të Policisë së Shtetit nr.925, datë 18.07.2019, për miratimin e procedurës standarde "Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre", Urdhrin e Drejtorit të Përgjithshëm të Policisë së Shtetit nr.938, datë 24.07.2019, për miratimin e procedurës standarde "Rregullat teknike të shoqërimit në mjediset e Policisë së Shtetit", si dhe zbatimin e rekomandimeve të Avokatit të Popullit të bëra gjatë inspektimeve të mëparshme.

Avokati i Popullit, pasi u njoh me konstatimet e grupit inspektues dhe nivelin e zbatimit të rekomandimeve të lëna nga inspektimi i mëparshëm, ka detyrimin kushtetues dhe ligjor t'ju parashtojë konkluzionet përfundimtare, duke ju referuar si më poshtë vijon:

Shënime të përgjithshme

Në përputhje me metodologjinë e zhvillimit të inspektimit në institucionet ku mbahen e trajtohen shtetas të privuar nga liria, grupi i punës u takua me shefin e rendit të Policisë Bulqizë, z. Ardian Balla, i cili u vu në dijeni lidhur me qëllimin e inspektimit.

Në vijim të takimit, shefi i rendit informoi grupin e inspektimit, mbi masat e marra për realizimin e rekomandimeve të lëna nga Avokati i Popullit në inspektimin e mëparshëm, lidhur me përmirësimin e kushteve sipas procedurave standarde të dhomave të shoqërimit të këtij komisariati.

Grupi inspektues, pasi mori informacionin e nevojshëm lidhur me qëllimin e inspektimit, vijoi takimin edhe me punonjësit e policisë së zyrës së informacionit dhe të shërbimeve të tjera.

U inspektuan ambientet e shoqërimit, zyrat e punonjësve të policisë, si dhe u verifikua dokumentacioni përkatës, në të cilin pasqyrohen veprimet e kryera me personat e shoqëruar, të arrestuar apo të ndaluar.

Nga informacioni dhe verifikimi në vend i zbatimit të rekomandimeve të Institucionit të Avokatit të Popullit nga inspektimi i vitit të kaluar, grupi i inspektimit konstatoi se¹:

- **Ishte plotësuar rekomandimi**, për pajisjen me një regjistër të posaçëm, vetëm për të miturit në konflikt me ligjin në Komisariatin e Policisë Bulqizë.
- **Ishte plotësuar pjesërisht rekomandimi** për instalimin e sistemit të monitorimit me kamera në dhomat e shoqërimit, por jo në të gjithë ambientin e Komisarariatit të Policisë Bulqizë për monitorimin e plotë të këtij institucioni.

Ndërkohë, nga inspektimi rezultoi se;

- **Nuk ishte plotësuar rekomandimi**, për krijimin e zyrës të përshtatshme për marrjen në pyetje/intervistimin e shtetasve të shoqëruar dhe të mitur gjatë kryerjes së veprimeve procedurale, nga oficerët e policisë gjyqësore dhe monitorimi i tyre me kamera.
- **Nuk ishte plotësuar rekomandimi**, për sigurimin e sistemit të ngrohjes ose vendosjen e pajisjeve elektrike në dhomat e shoqërimit, për ngrohjen e këtyre ambienteve kryesisht në periudhën e dimrit.
- **Nuk ishte plotësuar rekomandimi**, për plotësimin me orendi të nevojshme të dhomave të shoqërimit, me tavolina, si dhe pajisjen e tualeteve me lavamane dhe bolier për ngrohjen e ujit për të qenë sa më funksionale për personat e shoqëruar, të ndaluar apo të arrestuar në ambientet e Komisarariatit të Policisë Bulqizë.

Është rasti të theksojmë se lidhur me plotësimin e standardeve të ambienteve të shoqërimit dhe respektimin e të drejtave të shoqëruarve të ndaluarve/arrestuarve, rekomandimet e

¹ Dërguar rekomandimi për inspektimin e bërë në Komisariatin e Policisë Bulqizë, nr.K4/I67-2, datë 06.03.2020.

CPT-së dhe të Avokatit të Popullit duhen vlerësuar maksimalisht nga institucionet që ato ju drejtohen. Këto rekomandime nuk ju drejtohen personave të caktuar personalisht, por institucioneve të administratës publike dhe drejtuesve të tyre me cilësinë e titullarit. Ne vlerësojmë se nuk është qëndrim aspak serioz, mosreflektimi apo mbajtja e një qëndrimi zyrtar ndaj rekomandimeve të bëra nga Avokati i Popullit dhe më parë CPT. Pavarësisht ndryshimit të vazhdueshëm të titullarëve të institucioneve, ata kanë detyrimin ligjor në zbatim neneve 21 dhe 22 të ligjit nr. 8454, datë 04.02.1999 “Për Avokatin e Popullit”, i ndryshuar, të mbajnë qëndrimet e tyre ndaj rekomandimeve të Avokatit të Popullit.

Në përfundim të inspektimit, grupi inspektues vëren se megjithëse në Komisaratin e Bulqizës ishin marrë disa masa për përmirësimin e standardeve lidhur me të drejtat ligjore të personave të shoqëruar dhe të personave të arrestuar/ndaluar, nisur nga kushtet aktuale, vazhdonin të ishin të pranishme disa problematika dhe më konkretisht:

Ambientet e shoqërimit dhe kushtet e tyre

Në Komisaratin e Policisë Bulqizë ambienti i shoqërimi në tërësi ishte i ndërtuar sipas kërkesave të ligjit nr.108/2014 “Për Policinë e Shtetit” dhe Urdhrit të Drejtorit të Përgjithshëm të Policisë së Shtetit nr.925, datë 18.07.2019, për miratimin e procedurës standarde “*Rregullat teknike të shoqërimit në polici*”, duke krijuar dhoma shoqërimi të ndara më vete për femrat, personat e rritur dhe të miturit², të cilat ndodheshin në katin e parë të godinës kryesore.

Dhomat e shoqërimit kishin hapësirë dhe sipërfaqe të bollshme dhe ishin të pajisura me karrige për qëndrimin ulur të personave të shoqëruar, por mungonin tavolinat. Përmasat e dhomave të shoqërimit ishin 4mx3m, si dhe kishin kapacitet për mbajtjen dhe qëndrimin ulur deri 4 persona për secilën dhomë.

Dritaret e dhomave të shoqërimit ishin të siguruara me skarë hekuri në pjesën e jashtme, me qëllim parandalimin e largimit apo arratisjes së personave të shoqëruar nga këto mjedise. Dritaret ishin me përmasa të tilla që lejonin mundësinë e ajrimit dhe ndriçimit të plotë natyral. Në dhoma kishte edhe ndriçim artificial që furnizohej nga rrjeti elektrik.

Mjedisi dhe dhomat e shoqërimit nuk ishin të mirëmbajtura, të lyera dhe të pastra nga ana higjieno-sanitare. Ngjitur me dhomat e shoqërimit ndodheshin dy tualete, të ndara më vete për femra dhe meshkuj, me ujë të rrjedhshëm 24 orë, por mungonin lavamane dhe bolier për ngrohje të ujit, i cili është i domosdoshëm për mbajtjen pastër të higjienës së personave të shoqëruar në këtë institucion.

Në mjedisin e shoqërimit, grupi i inspektimit, nuk gjeti sende apo mjete të tilla që mund të shërbejnë për kryerjen e vetëvrasjeve apo për kundërveprim ndaj punonjësve të policisë.

Në ambientin e shoqërimit nuk kishte dhomë më vete për marrjen në pyetje/intervistimin e shtetasve të shoqëruar dhe të mitur. Kjo procedurë ndiqej nga punonjësit e policisë deri në përfundim të veprimeve procedurale me personat e shoqëruar, në zyrat e tyre të punës. Zyrat e punës së punonjësve të policisë nuk monitoroheshin nga sistemi i kamerave.

² *Kreu VI, pika 3 e procedurës standarde “Rregullat teknike të shoqërimit në polici”.*

Ndërsa, mjediset e dhomave të shoqërimit, ambientet e brendshme dhe pjesa e jashtme e tij, ishin pjesërisht të survejuara me kamera përgjatë 24 orëve. Mbikëqyrja me kamera në të gjithë mjedisin e komisariateve, përveç mjedisëve ku çenohet privatësia, është vlerësuar nga ana jonë si një proces thelbësor për tre arsye:

Së pari, mbikëqyrja me kamera ka një efekt parandalues për veprime të kundërligjshme që mund të kryhen si nga ana e të shoqëruarve, të ndaluarve apo të arrestuarve, ashtu dhe nga vetë punonjësit e policisë së shtetit.

Së dyti, mbikëqyrja me kamera dokumenton shumicën e ngjarjeve brenda ambienteve të komisarariatit, si dhe jep garanci për një gjykim objektiv dhe të paanshëm për masat disiplinore apo penale që duhet të merren ndaj individëve përgjegjës.

Së treti, dokumentimi filmik është një material mbi të cilin mund të konsultohen mjaft të dhëna apo pretendime për trajtimin e të shoqëruarve, të ndaluarve apo të arrestuarve dhe mund të nxirren përfundime të vlefshme dhe të paanshme në rekomandimet përkatëse që hartojnë institucionet monitoruese të pavarura. Vlen të theksohet se ata shërbejnë për të garantuar besimin e qytetarëve te policia e shtetit.

Në Komisariatin e Policisë Bulqizë, gjatë periudhës 01.01.2021 deri më 22.09.2022 ishin të shoqëruar, të ndaluar apo të arrestuar dhe të evidentuar në regjistrin e shoqërimit **49** persona, të cilët ishin vetëm persona madhorë. Gjatë kësaj periudhe nuk kishte të shoqëruar gra apo të mitur në konflikt me ligjin, sipas përcaktimeve të bëra në nenin 109 dhe 112/1 të ligjit “Për Policinë e Shtetit”.

Në kohën e kryerjes së inspektimit, nuk kishte asnjë person të shoqëruar në mjediset e komisarariatit, për rrjedhojë grupi i inspektimit nuk realizoi intervista lidhur me trajtimin që ju bëhet personave nga ana e punonjësve të policisë nga momenti i shoqërimit, gjatë kohës së qëndrimit në dhomat e shoqërimit, marrjes në pyetje apo intervistimit të tyre.

U evidentuan disa praktika të njëpasnjëshme ku rezultoi se, në përfundim të procedurave dhe veprimeve të kryera nga punonjësit e policisë së komisarariatit, mbaheshin procesverbalet përkatëse dhe një kopje e firmosur i jepej personit të shoqëruar.

Ambientet e sigurisë dhe kushtet e tyre

Në Komisariatin e Policisë Bulqizë nuk kishte ambiente të sigurisë dhe personat e arrestuar/ndaluar dërgoheshin menjëherë pas përfundimit të veprimeve procedurale, në dhomat e sigurisë së Komisarariatit të Policisë Dibër.

Regjistri i personave të shoqëruar, ndaluar/arrestuar, si dhe trajtimi i tyre

Gjatë inspektimit u konstatua se në Komisariatin e Policisë Bulqizë, “Regjistri i evidentimit të të dhënave për personat e shoqëruar” ishte i tipit “Model nr. 1” konform Urdhrit të Drejtorit të Përgjithshëm të Policisë së Shtetit nr.938, datë 24.07.2019, për miratimin e procedurës standarde “*Rregullat teknike të shoqërimit në polici*” dhe ishte i sekretuar.

Të gjithë personat e shoqëruar në organin e policisë, sipas dispozitave të ligjit nr.108/2014 “Për Policinë e Shtetit”, regjistroheshin në këtë regjistër nga punonjësi i policisë në zyrën e informacionit.

Nga këqyrja e këtij regjistri rezultoi se:

Koha e qëndrimit në gjendje shoqërimi e shtetasve ishte e ndryshme nga 1 orë deri në 10 orë. Rubrikat e regjistrimit ishin plotësuar në mënyrë korrekte, me përgjegjësi dhe saktësi nga punonjësit e policisë.

Në këtë komisariat kishte regjistër për personat e ndaluar/arrestuar, ku evidentoheshin të gjitha rastet e ndalimeve dhe arrestimeve të kryera nga punonjësit e këtij organi, dhe ishte i sekretuar. Nga verifikimi i këtij regjistri rezultoi se në rastet e arrestimeve dhe të ndalimeve të personave të shoqëruar, ora e arrestimit/ndalimit përputhej me orën e shoqërimit të tyre në organin e policisë.

Ndërkohë u konstatua se në këtë komisariat kishte regjistër për evidentimin e kërkesë/ankesave të personave të shoqëruar, të arrestuar dhe të ndaluar, sikurse parashikohet në nenin 115 të ligjit nr.108/2014 “Për Policinë e Shtetit”, i ndryshuar, por nuk ishte evidentuar asnjë ankesë apo kërkesë. Për këtë fakt, kërkuam shpjegime dhe na u njoftua se asnjë nga personat e shoqëruar dhe arrestuar nuk kanë paraqitur asnjë ankesë me vullnet të plotë.

Nga inspektimi u konstatua se Komisarati i Policisë Bulqizë, ishte pajisur me një regjistër të posaçëm, vetëm për të miturit në konflikt me ligjin. Nga këqyrja e këtij regjistri rezultoi se gjatë vitit 2022, nuk kishte pasur veprime për të miturit në konflikt me ligjin. Ky regjistër ishte hapur në zbatim të rekomandimit të Avokatit të Popullit, për marrjen e masave, për pajisjen e komisarateve të policisë me një regjistër të posaçëm, vetëm për të miturit në konflikt me ligjin³.

Për rrjedhojë u konstatua se ishte plotësuar standardi për pasqyrimin me saktësi dhe përgjegjësi të rubrikave të librit të shoqërimit nga punonjësit e policisë së zyrës të informacionit.

Ambientet e intervistimit

Në Komisaratin e Policisë Bulqizë, punonjësit e policisë i kryenin veprimet procedurale me shtetasit e shoqëruar në zyrat e tyre të punës. Këto zyra nuk ishin të monitoruara dhe ndërkohë në këtë komisariat nuk kishte ambiente të veçanta hetimi të monitoruara me kamera, gjatë kryerjes së veprimeve procedurale nga oficerët e policisë gjyqësore.

Lidhur me këtë fakt, Avokati i Popullit nisur edhe nga inspektimi i mëparshëm ka rekomanduar marrjen e masave për krijimin e zyrave të veçanta ku merren në pyetje shtetasit gjatë kryerjes së veprimeve procedurale nga oficerët e policisë gjyqësore dhe instalimin e sistemit të monitorimit me kamera në këto zyra, por sikurse u përshkrua edhe më sipër, ky rekomandim nuk është zbatuar ende.

³ Detyrim i përcaktuar nga ligji nr.37/2017 “Kodi i Drejtësisë Penale për të Mitur”.

Avokati i Popullit, duke ju referuar standardeve ndërkombëtare, e konsideron procesin e monitorimit filmik një element parësor për mbrojtjen e të drejtave dhe lirive të njeriut, pasi ka efekt parandalues për kryerjen e veprave të dhunshme dhe të dënueshme, si nga ana e të shoqëruarve, ndaluarve e arrestuarve, ashtu dhe nga vetë punonjësit e policisë së shtetit⁴.

Sipas përcaktimit të kreut VII pika 5/ç, të Urdhrit të Drejtorit të Përgjithshëm të Policisë së Shtetit nr.938, datë 24.07.2019, për miratimin e procedurës standard “Rregullat teknike të shoqërimit në mjediset e policisë së Shtetit”, parashikohet se, personat e shoqëruar deri në sqarimin e pozitës dhe arsyes së shoqërimit, mbahen në ruajtje dhe monitorim të punonjësit të policisë së funksionit të caktuar ose me mjete të tjera digjitale (sisteme të kamerave video-audio) dhe në vijim të kreut XIV pika 6/b, përcaktohet se, në dhomat e intervistimit/marrjes në pyetje të të arrestuarve/ndaluarve duhen regjistruar në elektronikë procesi i marrjes në pyetje apo veprimet e tjera procedurale hetimore me të arrestuarit/ndaluarit.

Avokati i Popullit, duke ju referuar edhe standardeve ndërkombëtare, e konsideron procesin e monitorimit filmik një element parësor për mbrojtjen e të drejtave dhe lirive të njeriut, pasi ka efekt parandalues për kryerjen e veprave të dhunshme dhe të dënueshme, si nga ana e të shoqëruarve, ndaluarve e arrestuarve, ashtu dhe nga vetë punonjësit e policisë së shtetit. Ky standard ndërkombëtar është parashikuar edhe në nivel kombëtar dhe shërben si për parandalimin e keqtrajtimeve, por edhe në garantimin e besimit tek forcat e policisë.

Komisariati i Policisë Bulqizë në kushtet aktuale nuk posedon hapësirë të posaçme për komunikimin apo intervistimin me persona të mitur, ndaj MKPT e konsideron me rëndësi të veçantë faktin se bisedat me fëmijët dhe pyetja e tyre duhet të realizohen në një ambient që duhet të jetë i përshtatur në mënyrë të posaçme për zhvillimin e intervistimeve me fëmijët, pasi nga intervistimi i tyre në kushtet aktuale mund të shkaktohen pasoja të rënda deri në trauma tek të miturit që janë në konflikt me ligjin.

Nga monitorimi që iu bë zyrave të punonjësve të policisë, nuk u gjetën sende, prania e të cilave të ekspozonte dhunë tek personat me të cilët ata kryenin veprime procedurale.

Ndihma juridike dhe psikologjike

Nga pyetja e punonjësve të policisë rezultoi se, në rastet kur të ndaluarit/arrestuarit madhorë nuk kishin mundësi financiare për të pajtuar avokat privat dhe kërkonin ndihmë juridike, atyre ju sigurohej mbrojtja me avokat të caktuar kryesisht.

Punonjësit e policisë i parashtruan grupit të inspektimit, se në rastet kur të ndaluarit/arrestuarit ishin të mitur, veprimet procedurale kryheshin në praninë e detyrueshme të avokatit mbrojtës të caktuar kryesisht dhe të psikologut. Avokatët

⁴ “Një sistem i monitorimit të vazhdueshëm i standardeve dhe procedurave të intervistave të policisë duhet vënë në zbatim, po ashtu; kjo kërkon një regjistrim të saktë të intervistave të personave në ambientet e policisë, të cilat, nëse është e mundur duhet të zhvillohen me pajisje regjistruese elektronike (audio dhe video). Duhet të kërkohet që të regjistrohen në mënyrë sistematike koha kur ka filluar dhe mbaruar intervista, ndonjë kërkesë të bërë nga i ndaluari gjatë intervistës, si dhe të personave të pranishëm gjatë çdo interviste.” CPT’ reports; Armenia: Visit 2010[par.18]

siguroheshin nga lista e avokatëve të dërguar nga organi i prokurorisë, ndërsa psikologu sigurohej nga Drejtoria Vendore e Policisë Dibër, por dhe në bashkëpunim me Shkollën e Mesme të qytetit të Bulqizës.

Gjithashtu, na u bë me dije se njoftimi për ndihmë juridike nga avokati i siguruar kryesisht për personin e shoqëruar bëhet menjëherë pasi merr miratimin e personit të shoqëruar në konflikt me ligjin. Vonesa e avokatit nga momenti i njoftimit është rreth 1 orë. Gjatë verifikimit të regjistrave të personave të shoqëruar u konstatua se procedura e ndjekur nga punonjësit e Komisarariatit të Policisë Bulqizë ishte zhvilluar konform ligjit.

Ndërkohë u konstatua se në këtë komisarariat zbatohet detyrimi ligjor i parashikuar në nenin 109/5 dhe 122/5 të ligjit Nr. 108/2014 “Për Policinë e Shtetit”, i ndryshuar, si dhe në kapitullin VII, pika a.3.4 të procedurave standarde për plotësimin dhe dhënien e procesverbalit të veprimeve të kryera me të shoqëruarit nga punonjësit e policisë që ishin ngarkuar me detyrën e kryerjes së verifikimit dhe trajtimin e çështjes përkatëse.

Përsa i përket psikologut na informuan se duke u bazuar në praktika, si: mbështetje psikologjike, diagnostikim, këshillim psikologjik, vlerësim, formim për persona që u privohet liria, ai sigurohet nga Shkolla e Mesme e qytetit të Bulqizës, por në rastet e të miturve në konflikt me ligjin, psikologu sigurohet menjëherë nga Drejtoria Vendore e Policisë Dibër, por edhe nga Bashkia apo Shkolla e Mesme e qytetit, sipas rastit vonesa në këto raste është gjysmë ore.

Në raste kur të shoqëruarit paraqesin probleme shëndetësore, ata i shoqërojnë, për të marrë ndihmën mjekësore në Spitalin e Bulqizës.

Gjatë inspektimit u konstatua se në korridoret e godinës dhe të ambientit të shoqërimit si dhe në dhomat e shoqërimit të këtij komisaritati **nuk ishin afishuar postera** me të drejtat ligjore të personave të shoqëruar në organin e policisë dhe të personave të ndaluar/arrestuar, të cilat të ishin të aksesueshme nga këta persona.

Përveç sa më sipër, Avokati i Popullit kërkon dhënien e kopjes së kartës së të drejtave që në momentin e hyrjes në komisarariat, për të garantuar njohuritë e tyre për të drejtat e tyre.

Përsa më sipër, bazuar në pikën 3 të nenit 63 të Kushtetutës ku parashikohet se: “*Avokati i Popullit ka të drejtë të bëjë rekomandime dhe të propozojë masa kur vëren shkelje të të drejtave dhe lirive të njeriut nga administrata publike*” dhe në bazë të nenit 21/b të ligjit nr. 8454 datë 04.02.1999 “*Për Avokatin e Popullit*”, i ndryshuar, ku përcaktohet se: “*Avokati i Popullit paraqet rekomandime për vënien në vend të së drejtës së shkelur tek organi administrativ, që, sipas tij ka shkaktuar shkelje të të drejtave dhe lirive*”, me qëllim zgjidhjen e problemeve të konstatuara gjatë këtij inspektimi,

REKOMANDOJMË:

1. Marrjen e masave të nevojshme për krijimin e një ambienti të përshtatshëm ku intervistohen/merren në pyetje shtetasit, gjatë kryerjes së veprimeve procedurale nga

specialistët dhe punonjësit e policisë në këtë institucion dhe të ndërpritet praktika e marrjes në pyetje të personave të shoqëruar në zyrat e punës⁵.

2. Marrja e masave të menjëhershme për dhënien një kopje të kartës së të drejtave që në momentin e hyrjes në Komisarlatin Bulqizë.
3. Marrjen e masave për të vendosur posterat e rinj me të drejtat dhe kartën e të drejtave të personave që shoqërohen në ambientet e komisarlateve, në vende që të jenë të aksesueshëm nga këta persona.
4. Marrjen e masave të menjëhershme për instalimin e sistemit të monitorimit me kamera vëzhguese në të gjithë ambientet e Komisarlatit të Policisë Bulqizë.
5. Marrjen e masave të nevojshme për krijimin e zyrave të posaçme për intervistimin e personave të mitur, duke ofruar një ambient të përshatshëm që duhet të jetë i rregulluar në mënyrë të posaçme për zhvillimin e bisedave me fëmijët.
6. Marrjen e masave të menjëhershme për sigurimin e sistemit të ngrohjes ose vendosjen e paisjeve elektrike në dhomat e shoqërimit, për ngrohjen e këtyre ambienteve kryesisht në periudhën e dimrit.
7. Marrjen e masave të menjëhershme për plotësimin me orendi të nevojshme të dhomave të shoqërimit, me tavolina, si dhe pajisjen e tualeteve me lavamane dhe bolier për ngrohjen e ujit për të qenë sa më funksionale për persona të shoqëruar, të ndaluar apo të arrestuar në ambientet e Komisarlatit të Policisë Bulqizë.
8. Marrjen e masave të menjëhershme nga strukturat vendore të Policisë së Shtetit, për trajnimin e punonjësve të policisë në Komisarlatin e Policisë Bulqizë, që kryejnë shërbim në ambientet e dhomave të shoqërimit për zbatimin e rregullave të parashikuara në procedurën standarde për ruajtjen e trajtimin e personave të shoqëruar në këtë institucion.

Për qëndrimin që do të mbani dhe masat që do të merrni në zbatim të këtij rekomandimi, të vihemi në dijeni brenda afatit **30 ditor** sipas nenit 22 të ligjit Nr. 8454, datë 04.02.1999 “Për Avokatin e Popullit”, i ndryshuar

Duke besuar në mirëkuptimin dhe bashkëpunimin tuaj.

KOMISIONER

AHMET PRENÇI

⁵ *Kreu VII, pika 4/d Procedurat standarde “Rregullat teknike të shoqërimit në polici”.*